



Na osnovu čl. 7. i 8. Zakona o ministarskim, vladinim i drugim imenovanjima („Službene novine Federacije BiH“, br. 12/03, 34/03 i 65/13), člana 64. stav 7. Zakona o zdravstvenoj zaštiti („Službene novine Federacije BiH“, br. 46/10 i 75/13), člana 34. Zakona o ustanovama („Službeni list R BiH“ br: 6/92, 8/93 i 13/94), tačke V Odluke o kriterijima za nominiranje/imenovanje predsjednika i članova upravnih odbora javnih zdravstvenih ustanova čiji je osnivač Kanton Sarajevo („Službene novine Kantona Sarajevo“, br: 19/12, 12/13 i 17/15) i tačke V Odluke o kriterijima za nominiranje/imenovanje predsjednika i članova nadzornih odbora javnih zdravstvenih ustanova čiji je osnivač Kanton Sarajevo („Službene novine Kantona Sarajevo“, br: 19/12 i 12/13), Ministrica zdravstva Kantona Sarajevo objavljuje

### **JAVNI OGLAS**

#### **za nominiranje/imenovanje člana upravnog odbora i člana nadzornog odbora javnih zdravstvenih ustanova, čiji je osnivač Kanton Sarajevo**

Objavljuje se Javni oglas za nominiranje/imenovanje na poziciju člana upravnog odbora i člana nadzornog odbora javnih zdravstvenih ustanova, čiji je osnivač Kanton Sarajevo, i to:

- 1. Upravni odbor J.U. „Dom zdravlja Kantona Sarajevo“ - jedan (1) član predstavnik Osnivača,**
- 2. Nadzorni odbor J.U. „Apoteke Sarajevo“- jedan (1) član predstavnik Osnivača.**

Upravni odbor zdravstvene ustanove čiji je osnivač Kanton Sarajevo, u skladu sa članom 67. stav 4. Zakona o zdravstvenoj zaštiti ima pet (5) članova i čine ga predstavnici: osnivača tri (3) člana od kojih jedan (1) mora biti ispred kantonalnog ministarstva zdravstva, stručnih radnika zdravstvenih ustanova dva (2) člana od kojih jedan (1) mora biti iz reda zdravstvenih radnika.

Nadzorni odbor zdravstvene ustanove čiji je osnivač Kanton Sarajevo, u skladu sa članom 34. Zakona o ustanovama ima tri (3) člana od kojih se najmanje jedan (1) imenuje iz reda stručnih radnika zaposlenih u ustanovi.

#### **Opis pozicije člana upravnog odbora:**

Upravni odbor zdravstvene ustanove, u skladu sa članom 65. Zakona o zdravstvenoj zaštiti donosi Statut zdravstvene ustanove, imenuje i razrješava direktora zdravstvene ustanove, utvrđuje planove rada i razvoja i godišnji program rada, donosi: finansijski plan i usvaja godišnji obračun, opšti akt o unutrašnjoj organizaciji i sistematizaciji poslova i druge opšte akte, odlučuje o svim pitanjima obavljanja djelatnosti radi koje je zdravstvena ustanova osnovana, ako zakonom nije određeno da o određenim pitanjima odlučuje drugi organ zdravstvene ustanove, usmjerava, kontroliše i ocjenjuje rad direktora, rješava sva pitanja odnosa sa Osnivačem, odlučuje o korištenju sredstava preko iznosa utvrđenog Statutom, odgovara Osnivaču za rezultate rada, odlučuje u drugom stepenu o prigovoru radnika na rješenje kojim je drugi organ određen Statutom odlučio o pravu, obavezi i odgovornosti radnika iz radnog odnosa, podnosi osnivaču najmanje jednom godišnje izvještaj o poslovanju, te vrši i druge poslove u skladu sa zakonom i Statutom, odnosno osnivačkim aktom.

#### **Opis pozicije člana nadzornog odbora:**

Nadzorni odbor zdravstvene ustanove, u skladu sa članom 35. Zakona o ustanovama analizira izvještaje o poslovanju ustanove, u obavljanju nadzora nad upotrebom sredstava za rad pregleda godišnji izvještaj o poslovanju i godišnji obračun ustanove, pregleda i provjerava urednost i zakonitost vođenja poslovnih knjiga, te izvještava osnivača, upravni odbor i direktora o rezultatima nadzora u ustanovi.

Člana upravnog i člana nadzornog odbora navedenih zdravstvenih ustanova imenuje Vlada Kantona Sarajevo, na prijedlog Ministrice zdravstva Kantona Sarajevo, na vremenski period do

isteka mandata Upravnog odbora J.U. Dom zdravlja Kantona Sarajevo imenovanog Rješenjem Vlade Kantona Sarajevo broj: 02-05-29188-28.2/16 od 06.10.2016. godine i isteka mandata Nadzornog odbora J.U. „Apoteke Sarajevo“ imenovanog Rješenjem Vlade Kantona Sarajevo broj: 02-05-9504-26.30/16 od 29.03.2016. godine.

Kandidati koji se kandiduju na navedene pozicije dužni su ispunjavati slijedeće opće i posebne uvjete:

▪ **Opći uvjeti:**

- da je državljanin Bosne i Hercegovine (dokaz: uvjerenje o državljanstvu ne starije od šest mjeseci);
- da je stariji od 18 godina, a da nije stariji od 65 godina (dokaz: rodni list ili ovjerena fotokopija rodnog lista);
- da nije otpušten iz državne službe kao rezultat disciplinske mjere, na bilo kojem nivou u Bosni i Hercegovini (bilo na nivou države ili entiteta) u razdoblju od tri (3) godine prije dana objave upražnjene pozicije (dokaz: izjava kandidata potpisana i ovjerena od strane nadležnog organa);
- da se na njega ne odnosi član IX.1. Ustava Bosne i Hercegovine - da nije pod optužnicom od strane Međunarodnog tribunala za bivšu Jugoslaviju (dokaz: izjava kandidata potpisana i ovjerena od strane nadležnog organa);
- da nije izabrani zvaničnik, nosilac izvršnih funkcija ili savjetnik u smislu Zakona o sukobu interesa u instituciji vlasti Bosne i Hercegovine (“Službeni glasnik BiH”, br: 13/02, 16/02, 14/03, 12/04, 63/08, 18/12 i 87/13), (dokaz: izjava kandidata potpisana i ovjerena od strane nadležnog organa).

▪ **Posebni uvjeti:**

- da ima završen VII (sedmi) stepen stručne spreme i najmanje pet (5) godina radnog iskustva, ako se kandiduje za člana upravnog odbora zdravstvene ustanove (dokaz: diploma ili uvjerenje o diplomiranju i potvrda poslodavca o radnom iskustvu sa tačno navedenim radnim iskustvom sa VII (sedmim) stepenom stručne spreme);
- da ima završen VII (sedmi) stepen stručne spreme i najmanje tri (3) godine radnog iskustva ili VI (šesti) stepen stručne spreme i najmanje pet (5) godina radnog iskustva ili IV (četvrti) stepen stručne spreme zdravstvenog usmjerenja i najmanje sedam (7) godina radnog iskustva, ako se kandiduje za člana nadzornog odbora zdravstvene ustanove (dokaz: diploma ili uvjerenje o diplomiranju i potvrda poslodavca o radnom iskustvu sa tačno navedenim radnim iskustvom sa VII (sedmim), VI (šestim) i IV (četvrtim) stepenom stručne spreme);
- da nema privatni - finansijski interes u zdravstvenoj ustanovi u čiji se upravni ili nadzorni odbor kandiduje (dokaz: izjava kandidata potpisana i ovjerena od strane nadležnog organa);
- da nije direktor zdravstvene ustanove, a koja ima status pravne osobe (dokaz: izjava kandidata potpisana i ovjerena od strane nadležnog organa) i
- da nije član više od jednog upravnog ili nadzornog odbora (dokaz: izjava kandidata potpisana i ovjerena od strane nadležnog organa).

Kandidati su dužni uz prijavu, koja sadrži kraću biografiju, adresu i kontakt telefon, priložiti originalne dokumente ili ovjerene fotokopije dokumenata ne starije od 6 mjeseci, kao dokaz o ispunjavanju općih i posebnih uvjeta traženih ovim oglasom.

Kandidati koji žele aplicirati i za člana upravnog i člana nadzornog odbora navedenih zdravstvenih ustanova, obavezni su za oba podnijeti posebnu prijavu, a dokumente kojima dokazuje ispunjavanje traženih uvjeta mogu priložiti u jednom primjerku.

Prijava sa traženim dokumentima se dostavlja lično ili poštom preporučeno, u zatvorenoj koverti, sa naznakom „PRIJAVA NA JAVNI OGLAS – (navesti naziv javne zdravstvene ustanove u čiji se upravni ili nadzorni odbor kandiduje) ČIJI JE OSNIVAČ KANTON SARAJEVO – NE OTVARAJ”.

Prijave se dostavljaju na slijedeću adresu: Ministarstvo zdravstva Kantona Sarajevo, ul. Reisa Džemaludina Čauševića br. 1, Sarajevo.

Oglas ostaje otvoren 15 dana od dana posljednjeg objavljivanja, a isti će biti objavljen u "Službenim novinama Federacije BiH", dnevnim novinama „Dnevni avaz“ i na web stranici Ministarstva zdravstva Kantona Sarajevo <http://mz.ks.gov.ba>.

Prijave koje ne sadrže propisano iz ovog oglasa, kao i prijave podnesene istekom roka utvrđenog u ovom oglasu, odbacit će se kao nepotpune odnosno neblagovremene, te se kao takve neće uzeti u razmatranje.

Svi kandidati koji budu stavljeni na listu sa užim izborom, biće pozvani na intervju pred Komisijom za izbor. Prije intervjua kandidati su dužni dati podatke o ranijim neposrednim rukovodiocima od kojih se mogu dobiti preporuke i informacije.

Na konačno imenovanje za člana upravnog odnosno nadzornog odbora navedenih javnih zdravstvenih ustanova, zainteresirana stranka može podnijeti prigovor, u skladu sa Zakonom o ministarskim, vladinim i drugim imenovanjima Federacije Bosne i Hercegovine.

Nakon završene procedure imenovanja, prijava i dokumentacija se neće vraćati kandidatima koji su aplicirali na ovaj javni oglas.

**MINISTRICA**  
**Zilha Ademaj, dipl. oec. s.r.**



web: <http://mz.ks.gov.ba>  
e-mail: [mz@mz.ks.gov.ba](mailto:mz@mz.ks.gov.ba)  
Tel: + 387 (0) 33 562-104, Fax: + 387 (0) 33 562-243  
Sarajevo, Reisa Džemaludina Čauševića 1

